

1 SAN JUAN

Yi Jayijpi Necy Huidibi San Juan Yajniguejxy Je Mibijcpidijc Nidüg'óciy

1 Dios y'ayuc jiiyim anajty co naaxhuiñybi chondacy. E tiy'ajt nyejcypich jadu'n nej nmidooyich ci'm yi' y'ayuc, jadu'n nej n'ijxyich miid ngi'mhuinich, jadu'n nej nhuindiicxyich yi' ci'm, e nañ jadu'n nej nnidoñich miid ngi'mgijich. Nyajnijayiybich miich ajcxy jada necy jadu'n nej je Cristo je Dios y'ung yjugy'ajtin yega'n huidibi ca' cixa'n tigoya'n niminaabi. ²Ti ñayguëxigyii ya naaxhuiñ je Dios y'ung huidibi ymiid jugy'ajtin huidibi ca' niminaabi ycixipy ytigoyipy. Ti n'ixyich ajcxy jigix jëbi tiy'ajt nyéjccixyich co ti ñayguëxigyii ya naaxhuiñ, etz ti n'ixyich jigix jëbi nyajnimaaygixy nej jëbi huaad huingbi jugy'ajtin nbaatim co anajty ti n'o'cim. Je Dios y'ung, je huidibi jiiby ijtp ma Dios Teedy, nayguëxici je! ma iich ajcxy. ³Je huidibi iich ajcxy n'ijxich nmidoahuich, cham miich ajcxy nyajnimaaygixy jigix jëbi ajt tú'ciy n'ijtim ma Dios ytiy'ajt, etz nañ jigix jëbi tú'ciy ajt n'ojadajtim Dios etz je! y'ung. ⁴Paady ycixp jada

tiy'ajt nyajnijäyiy ajcxy jigix ajcxy jotcujc'ajtin mbattáaygixipy miid jada ayuc tiy'ajt.

Dios yi' je' je tiicxin jájin

⁵Jadayaabi Dios y'ayuc ytiy'ajt Jesucristo ti xyajnimäyich e nañ cham iich miich ajcxy nyajnimaaygixy. Dios huädz ytiy'ajt miidity, ca' ma Dios aniidägy. Jadu'n Dios nipaady nej tüg jiin ytiicxy ma tüg it e ni ca' ni mina ypich. ⁶Co nminaanim co Dios ajt miid n'ijtim tú'ciy, e ca' yjanchity, ca' anajty ajt Dios ytiy'ajt nyajtuunim, jadu'n nipaady nej jihuüy ndzinaayim agootztuum. Nigoo n'iindaacim, ca' anajty ajt nguyduunim Dios ytiy'ajt. ⁷Co nguyduunim Dios ytiy'ajt jadu'n nej yi' ytiy'ajt miidity, jadu'n nipaty nej jihuüy ndzinaayim ma jiin ytiicxy. Huin'it jëbi ajt n'ijtim tú'ciy miñ xyipy, e Dios xyajpocynihuaatztaayim co Jesucristo y'o'cy etz ñi'py teemy gujy miid iich ajt nbocy ycixpi. ⁸Co ixipy nminaanim co ca' nbocytuunim, nigoob nayhuin'iinim

ci'm, e ca' jadu'n Dios ytiy'ajt yajpaady ma iich ajt njot nhuinma'n. ⁹Pen ngapxypidzimim ajt nbocy ma Dios, yi' ñidinaayb yi' y'ayuc huidibi ti xyajnimaaayim co ymecxamy ajt nbocy, e nañ tudägy ytuñ miid iich ajt ycixpi. Dios xyhuinmeecxim ajt nbocy etz xyajhuaatzim njot nhuinma'n jëbi n'ixmajtzim jibic-huinma'n. ¹⁰Co ajt nminaanim co ca' nbocytuunim, hue' anajty Dios nyajnajxim anii, e ca' anajty ti ngöbixim cixyot huinjot yi' ytiy'ajt.

Cristo, iich ajt nhuingapxpi ma Dios

2 Miich ajcxy migügtijc huidibi ooy ndzocy njihuüyich jadu'n nej ixypy ngi'm'ungich ngi'm'anäcich, cham jada tiy'ajt nyajnijayiygixy, jigix ca' ajcxy mdundigöoygixipy. Pen ji nidügti miich ajcxy huidibi tundigooyb, jada migüg huidibi tundigooyb huen mibijctzoy Dios ma Jesucristo yxii miid ypocy ycixpi. Jesucristo yi'je' huingapxp ma Dios Teedy miid ajt nbocy ycixpi. Tudägy je', e jëbi xyhuingapxim ma Dios Teedy. ²Com Jesucristo ti y'ögy miid iich ajt nbocy ycixpi, paady ycixp jëbi capx'oyiy ma Dios miid iich ajt ycixpi e xycapx'oyiyyim iich ajt nbocy etz nañ capx'oyiyyip tüg'óciy naaxhuüny jäy ajcxy ypocy, yi' jäy ajcxy pinjaty yi' y'ayuc ytiy'ajt mijpidaacip.

³Co Jesucristo ytiy'ajt nguyduunim yajxon, huin'it nejhuiiyim tiydudägy jadu'n nej Dios may'ajt oy'ajt ti tuñ miid iich ajt ycixpi. ⁴Co ixypy pinjaty ymina'n co ñejhuiyi Jesucristo

ytiy'ajt e ca' cuychinaayi yi' ytiy'ajt hue' yi' tzach aniidaacpi, e ca' miidity Dios ytiy'ajt. ⁵Yi' jäy ajcxy pinjaty cuychinaayb cuyjugy'ajtp yajxon Jesucristo y'ayuc ytiy'ajt, janch tiydudägy anajty yajmij'aty Dios. Co nguychinaayim nguyjugy'ajtim yajxon Jesucristo ytiy'ajt, huin'it jëbi nejhuiiyim co nyajmij'ajtim Dios. ⁶Yi' jäy ajcxy pinjaty minamb co ymiid Jesucristo y'ayuc ytiy'ajt ma je' y'ay yjot, copicy ajcxy chináaygixyipy jugy'ajtcixipy tim jadu'n nej Jesucristo chinay jugy'ajty.

Je jemybi ane'min

⁷Miich ajcxy migügtijc huidibi ooy ndzocy njihuüyich, ca' nminaanim jemybi tiy'ajt ajcxy nyajnimähuamy ma jada necy. Je' jada je' tiy'ajt huidibi jecy'ajty ti mnejhuiiygixy co oga'n ajcxy mmijpidacy Jesucristo. Jada tiy'ajt jecyip jada je' huidibi cham ajcxy mmidooyb jadüg'oc. ⁸Nañ jemy jada tiy'ajt nañ jadu'n huidibi nyajnimaaygixyp ma jada necy. Jada je'je' tiy'ajt huidibi Jesucristo ymiid ma yjot yhuinma'n etz nañ iich ajt nmiid ma ajt njot nhuinma'n. Yi' jecyip ayuc huidibi ca' ytiy'ajtity, ti yi' ñaxy e cham Dios ytiy'ajt tiydudägy nyajtuunim, jadu'n nej jihuüy je coodzpi ti ñaxy e cham ti xhiimiy.

⁹Yi' jäy ajcxy huidibi minam co Dios y'ayuc ytiy'ajt ajcxy cuyduuni e ca' ixäänigixy ymigügtijc, ca' yi' ajcxy tiydudägy Dios y'ayuc yajtuuni, jadu'n yhuimbizimiy jadu'n nej jihuüy agootztuuy ijtcixy. ¹⁰Yi' jäy ajcxy pinjaty tzojcp jihuüiyb

ymigügtijc hue' yi' yajpaatcixy miid Dios ytiy'ajt ma ajcxy yjot yhuinma'n, jadu'n nipaady nej jihuüy y'ljtcixy ma xii ytiicxy, ca' ajcxy ñiidigoy ytiidigoy ma Dios ytiy'ajt. ¹¹Yi jäy ajcxy pinjaty ca' ymigüg ixaangixy, ca' yi' ajcxy Dios ytiy'ajt ajcxy yajtuuni, jadu'n nipaady nej jihuüy agootztuuby y'ljtcixy, ca' ajcxy chinaaygixy nej Dios ytiy'ajt yja'ané'migixy, ca' ajcxy nejhuiygixy huidibi tiy'ajt jébi yajtungixy, com jibic-huinma'n chachtuumyb ajcxy huidibi ca' Dios tiy'ajt'adyii.

¹²Miich ajcxy migügtijc huidibi ooy ndzocy njihuüyich ajcxy jadu'n nej ixypy ngi'm'ung ngi'm'anäcich, com Dios ti miich ajcxy mbocy xyhuinmecxtay co Jesucristo y'o'cy miid ajcxy mbocy ycixpi, paady ycixp cham nnijayiygixy.

¹³Cham nnijayiygixy miich ajcxy mij'anäctijc, com ti mmijpidaaccixy Jesucristo huidibi jii'ajt co naaxhuiñybi oga'n choondacy etz chambaad yjii'atyñi. Cham nnijayiygixy miich ajcxy anäctijc, com ti mmimadaaccixy je ca'oybi.

Cham nnijayiygixy miich ajcxy pi'ctijc mutztijc com ti mmijpidaaccixy Dios Teedy.

¹⁴Cham nnijayiygixy miich ajcxy mij'anäctijc, com ti mmijpidaaccixy ajcxy Jesucristo huidibi jii'ajt co naaxhuiñybi oga'n chondacy etz yjii'atyñi chambaad. Cham nnijayiygixy miich ajcxy anäctijc, com mic mjot mhuinma'n miidity ajcxy etz Dios ytiy'ajt yajpatp ma ajcxy mjot mhuinma'n, paady ycixp ajcxy ti mmimadaaccixy yi ca'oybi.

¹⁵Migügtijc, ca' anaxy m'adzójccixip yi huidibi miid ndzinaayim ya naaxhuiñ. Yi jäy ajcxy huidibi adzojctaayb anaxy yi huidi miid ndzinaayim, ca' ajcxy Dios Teedy yajmij'ajtcixy. ¹⁶Ca' anaxy m'adzojctähuipy ajcxy tüg'óciy huidijaty ya naaxhuiñ yajpatp, jadu'n nej njot nhuinma'n tzojcm, jadu'n nej tijaty n'ijxim, jadu'n nej huidibi amij agix miid ndzachnayjihuiyim. Com yi jadu'mbi huinma'n ca' yajpaady ma Dios Teedy, hue' yi' yajpaady ya naaxhuiñ. ¹⁷Huidijaty ya naaxhuiñ yajpatp cixipy tigoyipy yi', nañ jadu'n ytigoya'n huidijaty yi huinma'n y'adzojcpy. Yi jäy ajcxy pinjaty Dios ytiy'ajt yajtuunip jadu'n nej Dios tzocy, jugy'adipy ajcxy e co y'ó'ccixipy, ca' ajcxy y'alma ytigóoygixipy.

Je tiy'ajt etz je anii

¹⁸Miich ajcxy migügtijc huidibi ooy ndzocy njihuüyich nej ixypy ngi'm'ung ngi'm'anäcich, tim cijxnip tiempo ya naaxhuiñ. Ti jada mnejhuiygixy co miinaam jäy ajcxy huidibi nayyajnaxaanip nej Cristo' e ca' yjanchity. Miid co cham ji mayjäy ajcxy huidibi nayyajnaxip jadu'n nej Cristo, paady nejhuiyim co tim cijxnip yi tiempo miid iich naaxhuiñyjäy ajt ycixpi. ¹⁹Yi jäy ajcxy huidibi nayyajnaxaanip jadu'n ixypy nej Cristo, naybijc-huäcxaanip yi' ajcxy miid iich ajt, ca' anajty ajcxy ytiügüy yi' ajcxy yhuinma'n miid iich ajt nhuinma'n, tügmucy ixypy ajt xymiid'ijtim. Ji jadu'n ñiguëxigü co ca' ytiügüy

yhuinma'n miid iich ajt nhuinma'n co ti ajcxy xypuhuäutuutim.

²⁰Ti miich ajcxy xy'adigiy xyjottigiy Dios yjihui'n ymic'ajt, paady miich ajcxy mhuinjihuiy tüg'óciy Dios y'ayuc ytiy'ajt. ²¹Ca' nminaanim paady miich ajcxy nijayiiygixy co ca' mhuinjihuiygixy Dios ytiy'ajt. Paady nnijayiiygixy miich ajcxy jigix mnejhuüygixyip Dios ytiy'ajt etz mnejhuüygixyip co yi jäy ajcxy huidibi indaacp, ca' yi' ajcxy Dios ytiy'ajt miidity.

²²Yi' je' indacp huidibi minamb co Jesús ca' yi' yjējity je Cristo huidibi Dios yquejx. Yi indacpi je'midzip'ajtp Jesucristo etz ca' mibicy Dios Teedy etz nañ ca' mibijci Dios y'ung. ²³Je jäy ajcxy huidibi indacp minam co Jesús ca' yjējity je Cristo, e nañ ca' ajcxy miidity Dios Teedy ytiy'ajt. Yi jäy ajcxy huidibi minam co Jesús yjējity je Cristo je Dios y'ung, nañ ymiid ajcxy Dios Teedy ytiy'ajt.

²⁴Je ayuc tiy'ajt huidibi miich ajcxy mmidou co oga'n ajcxy mmijpidacy Jesucristo, jada ayuc tiy'ajt mguydúngxixipy e ca' mjäy digóoygixipy. Pen mmi'ijtcixp yi ayuc huidibi Dios yjäy oga'n ajcxy xyaj'ixpijc, huin'it jēbi miich ajcxy myajpatcixy ma Dios y'ung etz je' yajpaady ma Dios Teedy. ²⁵Dios ti xyajhuinhuaniiyim co xyajtzinähuaanim ajt n'alma huinixii huinitempo.

²⁶Jada tiy'ajt ajcxy nyajnijayiiyb jigix ca' mmijpidáaccixipy yi' ajcxy y'ayuc huidibi xyajhuinma'nydigoyaam ajcxy.

²⁷Yi Dios yjihui'n ymic'ajt huidibi ti xy'adigiigixy ti xyjottigiigixy

ijttiib yi' ma miich ajcxy mjot mhuinma'n. Paady ycixp ca' myajmayajtcixy pin xyaj'ixpigip ajcxy com je Espíritu Santo xyaj'ixpigip ajcxy. Je Espíritu Santo xyajni'ixiydaayb ajcxy tüg'óciy Dios ytiy'ajt, tiydudägy yi', ca' yi' y'aniijity. E jadu'n nej je' xyajni'ixiiygixy, jadu'n mguydunipy ajcxy. Mi'ijtcix Dios yjihui'n ymic'ajt ma mjot mhuinma'n ajcxy.

²⁸Miich ajcxy migügtijc, mi'idipy ajcxy Jesucristo ytiy'ajt ma mjot mhuinma'n jigix co ñayyajnigüëxgiyib Jesucristo ya naaxhuiñ jadüg'oc, huin'it jotcujc ajt nnayjihuiyim etz ni ca' jibic nayjihuiyim co anajty xyñimiinim. ²⁹Ti mnejhuiygixy co yi Jesucristo tiydudägy ytuñ, e ti mnejhuiygixy nañ jadu'n co tüg'óciy yi jäy huidibi tiydudägy tumb, yi' je' ajcxy Dios y'ung'ajtip.

Dios iich ajt xy'ung'ajtim

3 Jihui'nybijccix tüg'óciy je mijpi may'ajt Dios Teedy ti tuñ miid iich'ajt ycixpi jigix jēbi naydijim Dios y'ung. Yi naaxhuiñyäj ajcxy huidibi ca' mijpidaaccixy Jesucristo ca' ajcxy nejhuiygixy huinjihuiygixy Jesucristo ytiy'ajt, paady ycixp ca' ajcxy nejhuüy huinjihuiy co Dios xy'ung'ajtim. ²Miich ajcxy migügtijc huidibi ooy ndzocy njihuüyich, jadachambi Dios iich ajt xy'ung'ajtim. Jadachambi ca'p y'ocnigüëxgyñi nej iich ajt jiini n'idaanim. Co anajty Jesucristo ymiin jadüg'oc ya naaxhuiñ, huin'it nguipxyjatytiyim miid je', com n'ixaanim ajt Jesucristo jadu'n

nej je' yajpaady. ³Tüg'óciy jāy ajcxy huidibi jįp'įjxp co Jesucristo ymiina'n jadüg'oc ya naaxhuiñ, copicy yajhuädzipy ajcxy yjot yhuinma'n. Huen mi'įjtcixy oyjot oyhuinma'n jadu'n nej Jesucristo mi'ity oyjot oyhuinma'n.

⁴Tüg'óciy jāy ajcxy huidibi pocytumb, hue' ajcxy ymidundigooyb Dios ycötujcin. Co ajcxy ytundigoy, ca' ajcxy ymadägy nej cuydunipy Dios ycötujcin. ⁵E mnejhuiyb miich ajcxy co yi Jesucristo ti ñayguëxigyii ya naaxhuiñ jigix jëbi xyajpocyññhuaatzim. Jesucristo ca' anajty ti pocy miidity, ca' anajty ma ti ytundigoy. ⁶Tüg'óciy jāy ajcxy huidibi cuydundähuam Jesucristo ytiy'ajt, ca' huaad pocytuñ. Yi jāy ajcxy huidijaty pocytundiib, ca'ni ixy ajcxy yi Jesucristo, nañ ca'ni ajcxy huinjihuiyi yi' ytiy'ajt. ⁷Miich ajcxy migügtijc huidibi ooy ndzocy njihuiyich jadu'n nej ngi'm'ung ngi'm'anäcich, ix ni pin xychahuin'iingix. Yi jāy ajcxy huidibi oyjot oyhuinma'n yajtumb, tiydudägy yi' ajcxy chinäy yjugy'ajty, tim jadu'n nej Jesucristo tiydudägy chinay yjugy'ajty. ⁸Yi jāy ajcxy huidibi tzachpocytundiibni, yi' ajcxy mujcu' yjāy'ajtip. Com jadu'n nej chondacy je naaxhuiñybi oga'n yi mujcu' jëni anajty jadu'n chachpocytuñ. Paady ycixp Dios quejxy y'ung ya naaxhuiñ co je mujcu' yhuinma'n yajcödīgogyaani.

⁹Yi jāy huidibi Dios ajcxy ti ymöyii jemybi jot jemybi huinma'n, ca' ajcxy ypocytundiyy com je'co tú'ciy ajcxy yjot yhuinma'n miidity, jadu'n nej anajty Jesucristo yjot

yhuinma'n miidity, ca' huaad ajcxy ypocytundiyy com Dios ti ymöyii ajcxy jemybi jot jemybi huinma'n. ¹⁰Paady ycixp yñiguëxigy yi jāy ajcxy pinjaty Dios y'ung'ajtip etz pinjaty mujcu' ung'ajtip. Yi huidibi ajcxy ca' tiydudägy cuydungixy Dios ytiy'ajt etz ca' ajcxy ixa'n ymigügtijc, etz ca' ajcxy tzocy jihuïy ymigügtijc, hue' ca' ajcxy Dios ymöyii jemybi jot jemybi huinma'n, mujcu' ajcxy y'ung'ajtip.

Naychojcm nayjihuiyim miñ xyipy

¹¹Jada je' je ayuc tiy'ajt huidibi miich ajcxy ti mmidoogixy co oga'n ajcxy mmįpidacy Jesucristo co copicy naychojcm nayjihuiyim nidüg nidüg. ¹²Ca' huaad jadu'n n'idiitzim nej Caín y'idiich co anajty mujcu' huinma'n miidity, chi y'uch yaj'o'cy. ¿ Nej co y'uch yaj'o'cy? Je' co anajty je' jibic-huinma'n yajtuñ, e je' y'uch oyhuinma'n anajty yajtummyb paady ycixp je y'uch yaj'o'cy.

¹³Miich ajcxy migügtijc, ca' ooy mdzachhuinmaay ajcxy co ca' yi naaxhuiñyajāy ajcxy xy'ixa'n, huidibi ajcxy ca' Dios y'ayuc mįpidaaci. ¹⁴Com iich ajt nnejhuiyim co je nmigügtijc ajcxy ndzocim njihuiyim co n'o'cim, huin'it njugypigaanim e ndzinähaanim jiiby tzajpjoty huinixii huinitempo. Yi jāy ajcxy pinjaty ca' ymigügtijc ixa'n ajcxy co ajcxy y'ögipy, huin'it ca' ajcxy chinähua'n jiiby tzajpjoty. ¹⁵Huenpinjāyity huidibi ca' ymigüg ixa'n, nipatpy nej ytundigoy jadu'n nej jāyyaj'o'cpi ytundigoy e nañ jadu'n nejhuiyim, co je' y'ögipy, ca' chinähua'n

jiiby tzajpjoty. ¹⁶Ya ixypiy jēbi iich ajt iixpejt nbijcim nej huaad migügtijc ndzojcm njihuiiyim, jadu'n nej Jesucristo iixpejt yejcy co ñayyojxi ñaydooci co y'o'cy miid iich ajt nbocy ycixpi. Paady ycixp iich ajt jēbi huaad ndzojcm njihuiiyim nmigügtijc, oy jada ndimco'ögiyim. ¹⁷Janch pinjaty yjamiid ymadaacin, e yja'ixpy co ymigüg tigati yajmayjaty, e amij agix ñayjihuiiyii, ca' pa'ayo'n miidity, ca' pubeda'n ymigüg, ca' je' anajty tzocy jihuiy ymigüg jadu'n nej Dios chogyii yjihuiiyii. ¹⁸Miich ajcxy migügtijc huidibi ooy ndzocy njihuiyich jadu'n nej ixypiy ngi'm'ungich, miid oyjäy'ajtin etz miid Dios ytiy'ajt tzoc yajxon naychojcm nayjihuiiyim miñ xyipy. Ca' nminaanim nigoo ngapxim nmiydaacim ahuac aguuy.

**Cixyjot huinijot
naybidaacim ma Dios**

¹⁹Co nyajtuunim oyjäy'ajtin miid iich ajt nmigügtijc, huin'it nejhuiiyim co Dios ytiy'ajt nguyduunim e jotcujc nayjihuiiyim co Dios n'ojadajtim. ²⁰Co jibic njot nhuinma'n ajt njihuiiyim, miid co ca' oyjäy'ajtin nduunim, jac nigi Dios jibic ñayjihuiiyii com yi' jacmijhuinma'n miid, ca'ydi iich ajt, e yi' nejhuiydaayb tüg'óciy tijaty ajt nduunim. ²¹Miich ajcxy migügtijc huidibi ooy ndzocy njihuiyich, co ca' ti jibicpi njihuiiyim ma ajt njot nhuinma'n miid co oybi nduunim, huin'it jotcujc ajt n'ijtim miid Dios. ²²E huentimtiijity huidibi iich ajt Dios nayjmiibijctzoohuim, yi' xymooyim

miid co yi' y'ayuc nguyduunim, e nduunim je huidibi yi' yjäygidacpy. ²³Dios jada ti xyajnajtz'ane'miiyim co tzoc mibijcm mijpidaacim yi' y'ung Jesús etz tzoc naychojcm nayjihuiiyim miñ xyipy, jadu'n yi' ti xyajnajtz'ane'miiyim. ²⁴Yi jäy ajcxy pinjaty cuydumb Dios ytiy'ajt, yajpatp ajcxy ma Jesucristo e nañ Jesucristo yajpatp ma je'ajcxy. Nejhuiiyim co Jesucristo ytiy'ajt yajpaady ma iich ajt miid co je Dios yjihui'n ymic'ajt ti xy'adigiyim xyjottigiyim.

**Dios yjihui'n ymic'ajt etz
je ca'oybi yjihui'n**

4 Miich ajcxy migügtijc huidibi ooy ndzocy njihuiyich, ca' ajcxy mmibijctähuipy tüg'óciy jäy huidibi Dios y'ayuc capxhuäcxip. Mido'mbijccixy jayijp peni janch ajcxy miidity Dios yjihui'n ymic'ajt. Com ji mayjäy ya naaxhuiñ huidibi minam co Dios y'ayuccapxhuäcxi yi' ajcxy e ca' yjanchity. ²Jada je' tiy'ajt ma huaad mjihui'ñybijccixy pen janch miidity ajcxy Dios yjihui'n ymic'ajt, yi' ajcxy huidibi Dios y'ayuccapxhuäcxip: tüg'óciy jäy huidibi capxhuäcxp co Jesucristo yma'xung'ajty ya naaxhuiñ miid ñinicx, Dios yi' ytiy'ajt ymiid. ³E tüg'óciy jäy ajcxy huidibi ca' ñigapxpety ajcxy co Jesucristo chinäy ya naaxhuiñ miid ñinicx, ca' yi' Dios ytiy'ajt miidity. Ti miich ajcxy ayuc midoogixy oga'n co miinaam yi' naaxhuiñyjäy ajcxy miid je mujcu' yjihui'n ymic'ajt, huidibi midzip'ajtp Jesucristo. E ti je'du'n ajcxy ymiingixy. Jada je'du'n

ajcxy huidibi ca' nīgapxpejtcixy co Jesucristo yma'xung'ajty ya naaxhuiñ miid ñinīcx.

⁴Mīgūgtjic huidibi Dios yjihuiñ ymic'ajt ti xy'adigiīgixy ti xyjottigiīgixy, e ti miich ajcxy mmimadaaccixy yi huidibi ajcxy nīgapxpejtp co Jesucristo ca' ma'xung'ajty ya naaxhuiñ miid ñinīcx. Com Dios huidibi miich ajcxy xy'ane'mb, jac mij yi' ca'ydi je mujcu', paady miich ajcxy ti mmimadaaccixy je mujcu'. ⁵Je huidi ajcxy jadu'n jaminaamb co Dios y'ayuc capxhuācxī e ca' yjanchity ya naaxhuiñ ajcxy tiy'ajt ti patcixy ma je mujcu', paady ycixp yi naaxhuiñ yhuij'ajtin ajcxy tzachcapxhuācx, e yi naaxhuiñjāy tzachmījpidaaccixy etz amidoo'ijti ajcxy y'ayuc. ⁶İich ajt tiy'ajt ti nbaatim ma Dios. Tüg'óciy jāy ajcxy huidibi Dios ytiy'ajt huinjihuiyip, y'amidoo'ijtyp ajcxy iich ajt n'ayuc. Yi jāy ajcxy huidibi ca' Dios ytiy'ajt miidity, ca' ajcxy amidoo'ijtcixy iich ajt n'ayuc, paady ycixp n'ijxcajpim je jāy ajcxy huidibi tudāgyip, etz je jāy ajcxy huidibi nigoo tzach'anīdaacp.

Dios ooy xychojcm xyjihuiyim

⁷Miich ajcxy mīgūgtjic huidibi ooy ndzocy njihuiyich, tzoc oy yajxon naychojcm nayjihuiyim miñ xyipy. Dios ti yecy ymic'ajt ma ajt njot nhuinma'n jīgix jēbi ajt naychojcm nayjihuiyim miñ xyipy. Tüg'óciy jāy huidibi ymīgūgtjic chojccixyp yjihuiyīgixyp, ti Dios yjihui'n y'adigiīgixy yjottigiīgixy etz ñejhuiyip yhuinjihuiyip ajcxy Dios y'ayuc

ytiy'ajt. ⁸Pinjaty ca' ymīgūg tzocy jihuīy, ca' yi' nejhuiyi huinjihuiyi Dios ytiy'ajt, com Dios tüg'óciy yi' tzojctāy. ⁹Jada jel'e tiy'ajt co Dios ajt xychojctaayim co je y'ung huidibi tūgpajcpi ymiid, quejxy ya naaxhuiñ jīgix iich ajt nbaatim Dios yjihuiñ ymic'ajt miid yi' ycixpi. E Dios yjihuiñ ymic'ajt ca' ycixa'n ytigoya'n nimina, paady iich ajt njugy'ajtin ca' ycixa'n ytigoya'n. ¹⁰Dios ti xychojcm ti xyjihuiyim, paady quejxy y'ung ya naaxhuiñ jīgix jēbi xycodinaayim ma yi Dios ycōtujctac miid iich ajt nbocy ycixpi. Ca' nminaanim miid co Dios ti ndzachmījpidaacim ooy mijcajee, hue' janchtiy yi' ninigoob may'ajt tuñ miid iich ajt ycixpi.

¹¹Miich ajcxy mīgūgtjic huidibi ooy ndzocy njihuiyich, miid co Dios jadu'n ajt ti xychojcm ti xyjihuiyim mijcajee oga'n, paady ycixp tzoc iich ajt naychojcm nayjihuiyim miñ xyipy. ¹²Ni minaabi pin ca' ixyñi Dios. Co naychojcm nayjihuiyim miñ xyipy, huin'it Dios yjihuiñ ymic'ajt ijtitiy ma iich ajt njot nhuinma'n. Jadu'n Dios yjihuiñ ymic'ajt xypubejtim xypudigiyim, jēbi nīgi naychojcm nayjihuiyim nidūg nidūg jadu'n nej Dios jāygidāgy. ¹³Nejhuiyim iich ajt co nyajpatim ma Dios, e nañ jadu'n Dios yajpaady ma iich ajt, miid co yi' yjihuiñ ymic'ajt ti xy'adigiyim ti xyjottigiyim. ¹⁴E iich ajcxy, ti iich ajcxy yi Jesucristo n'ixyich, paady iich ajcxy nidiy'ajt'ajtyich co je Dios Teedy quejxy y'ung ya naaxhuiñ co yajnidzōga'n tüg'óciy naaxhuiñjāy co anajty Dios nbocy ajt xyajcomidoohuanim.

¹⁵Tüg'óciy jäy huidibi nigapxp co Jesús je' yi' Dios y'ung, Dios yajpatp ma yi' e nañ yi' yajpatp ma Dios.

¹⁶Ich ajt nnejhuiyim etz nmijpidaacim jadu'n nej Dios ajt xychojcm xyjihuiyim nidüg'óciy. Dios chojctaayb yi' nidüg'óciyi yi jäy. Pinjaty tzojccixp jihuiygixp ymigügtijc, hue' yajpatp yi' ajcxy ma Dios e nañ Dios yajpatp ma yi' ajcxy. ¹⁷Miid co yajxon nmijpidaacim Dios paady jotcuje nnaxaanim ma Dios ycótujctac, mīna anajty xyajcomidouhuim ajt nbocy. Com tú'ciy ich ajt nyajpaatim ya naaxhuiñ, tim jadu'n nej yi' Jesucristo. ¹⁸Co nmijpidaacim Dios, huin'it ca' ajt nmidzigiiyim nmidzo'yduunim. Peni yajxon nmijpidaacim Dios, huin'it jēbi tzig'iñ nyajqueecim. Yi jäy ajcxy huidibi tzigiiyb etz tzo'ydum, ca' ajcxy Dios mijpidägy yajxon.

¹⁹Com Dios jayijp ti xyjihuiyim, paady ycixp tzoc ajt naychojcm nayjihuiyim nidüg etz nañ nmijpidaacim Dios. ²⁰Yi jäy ajcxy pinjaty jadu'n minam co mijpidaaccixy Dios, e ca' ymigüg tzogaangixy ixaangixy, hue' je' ajcxy aniidaacp. Com peni ca' jajtciyx nej tzójccixipy jihuihuigixipy yi ymigügtijc huidibi ajcxy ix'y'ajtpy, ca' ajcxy jadip nej mijpidaaccixipy Dios huidibi ca' ix'y'ajtigixy. ²¹E Dios ich ajt xyñajtz'ane'miiyim co pin Dios mibijcp mijpidacp, huen nañ jadu'n ymigügtijc tzocy jihuiy.

**Yi pin huidibi ca' ixañ
midohua'ñ Cristo y'ayuc**

5 Tüg'óciy jäy huidibi
mibijccixp co Jesús je' je'

je Cristo huidibi Dios yquejx ya naaxhuiñ, Dios ajcxy y'ung'ajtip. Tüg'óciy jäy huidibi mibijccixp mijpidaaccixp Dios Teedy, nañ jadu'n huen tzojccixy yjihuiygixy je' ajcxy huidibi Dios y'ung'ajtip. ²Co ndzojcm njihuiyim huidibi Dios y'ung'ajtip, je' jada je' je ixpejt co nañ jadu'n jēbi nmijpidaacim Dios etz jēbi nguyduunim nej xyñajtz'ane'miiyim. ³Co nmijpidaacim Dios, huin'it nguyduunim jadu'n nej Dios xyñajtz'ane'miiyim e yi' y'ayuc ca' ooy chipity co nguyduunim. ⁴Com tüg'óciy yi jäy ajcxy huidibi Dios ti y'adigiiyi ti yjottigiiyi yjihuiñ ymic'ajt, ymihuindinaayb ajcxy yi jibic-huinma'ñ ya naaxhuiñ. Co nmibijcm Dios, huin'it jēbi mihuindinaayim yi jibic-huinma'ñ ya naaxhuiñ. ⁵Yi jäy ajcxy pinjaty mibijcp co Jesús Dios je' y'ung, yi' ajcxy mihuindinaayb yi jibic huinma'ñ ya naaxhuiñ.

**Je ayuc huidibi nidiy'ajt
yi Dios y'ung**

⁶Yi Jesucristo je' je' huidibi miin ya naaxhuiñ, je' je' huidibi niibejt etz ñi'py teemy guj co y'o'cy miid jäy ajcxy ypocy ycixpi. Ca' nmīnaanīm jēyi anajty ti ñibety, hue' nañ jadu'n ti y'ögy miid ajt nbocy ycixpi. ⁷E yi Espiritu Santo yi' tiy'ajt yejcp co Dios Jesús y'ung'adyii, com je Espiritu Santo yi' Dios ytiy'ajt ymiid. ⁸Ji tugiignax huidibi tiy'ajt yejcp co Dios Jesús y'ung'adyii: je Espiritu Santo, je niibejtin, etz Jesús ñi'py co teemy cujy miid ich ajt nbocy ycixpi. E jadu'n nidugiig ñaybátigixy tügnax, e tügnax ytiy'ajt yejccixy.

⁹Mijpidaacim iich ajt jäy y'ayuc co Dios Jesús y'ung'adyii, nīgi copicy co nmijpidaacim Dios ytiy'ajt huidibi ti yecy miid y'ung ycixpi, com jac mic'ajt miid yi' ca'lydi jäy ajcxy.

¹⁰Yi jäy huidibi mijpidaaccixp Dios y'ung, ymi'ijtpy ajcxy je tiy'ajt ma yjot yhuinma'n. Yi jäy ajcxy huidibi ca' mibijccixy mijpidaaccixy je Dios y'ayuc ytiy'ajt, hue' ajcxy yajnaxcixy Dios nej aniidägyin co ca' mibijccixy yi Dios ytiy'ajt co y'ung nigapxy.

¹¹Jada je' tiy'ajt co Dios ti xymooyim ajt n'alma yjugy'ajtin huidibi ca' ycixipy ytigoyipy nimina. Dios y'ung ca' y'alma ycixipy ytigoyipy nimina, paady yi' ti yaj'oyiy nej jëbi ajt n'alma y'ijtim huinixii huinitempo.

¹²Pinjaty ti mijpidaaccixy Dios y'ung, yi' ajcxy y'alma ca' ycixipy ytigoyipy nimina. Pinjaty ca' mijpidägy Dios y'ung, yi' ajcxy y'alma cixipy ytigoyipy co y'ögipy.

Capxycijxin etz capxhuijin

¹³Jadayaabi ayuc ajcxy nyajnijayiiygixp ma jada necy jigix jëbi mijpidáaccixipy Dios y'ung, etz jëbi mnejhuiygixy tiydudägy co mjugypijccixipy jadügtecy co anajty ti m'o'ccixy e ca' ajcxy m'alma ycixipy ytigoyipy.

¹⁴Jada jotcuje'ajtin iich ajt nmiid'ajtim co nmibijctzouhuim Dios jadu'n nej Jesucristo xyñajtz'ane'miiyim, yi' iich ajt jëbi xymidouhuim.

¹⁵Miid co nnejhuiiyim co yi' ajt xymidouhuim ma tijaty Dios nyajmibijctzouhuim, paady ycixp nejhuiiyim co nmiid'ajtim tijaty anajty ti nyajmibijctzou.

¹⁶Co pinjaty ixxy co ymigüg ypocytuñ huidibi huaad jëbi Dios meecxy, huen mibijctzooyi Dios miid yi' ycixpi, e Dios yajtzinähuiiyb pen ca' anajty ooy ymijpocyty je tiibi anajty tuñ. Com ji tüg mijpocy huidibi Dios ca' huinmecxy. Pen ti mijpocytuñ ca' huaad Dios ocjadmibijctzooni com ca' yi' y'oc-huinmecxaani. ¹⁷Tüg'óciy jibic-huinma'n huidibi jäy ytumyb, pocy yi', per ji jibic-huinma'n huidibi jäy ytumyb, huidi jëbi Dios huinmecxy e ca' y'alma ytigoyip.

¹⁸Nejhuiiyim co tüg'óciy pinjaty Dios ti ymöyii jemybi jot huinma'n, ca' yi' y'ocpocytuni. Yi Dios y'ung, huidibi ti ymóoyigixy jemybi jot huinma'n, cuend'ajtip yi' ajcxy, ca'lydi je mujcu' xyajhuinma'nydigóoyigixy.

¹⁹Nejhuiiyim iich ajt co Dios jadu'n xy'ane'mim njot nhuinma'n etz nejhuiiyim co tüg'óciy jacjadyii naaxhuiñyäjy huidibi ca' mijpidaaccixy Dios, je mujcu' jadu'n yjot yhuinma'n y'ane'mip ajcxy.

²⁰E nejhuiiyim co yi Dios y'ung ya y'oy naaxhuñ e ti xyajnejhuiiyim yi' y'ayuc ytiy'ajt, jigix jëbi nejhuiiyim huinjihuiiyim yajxon je Dios janchypi tudägypí. Nmi'ijtim ma iich ajt ndzinaayin je janchypi je tudägypí je Dios y'ung je Jesucristo. Jada jëdu'n je tiydudägypí Dios, etz je Dios yjugy'ajtin caminaabi ycacixy ycatigoy. ²¹Miich ajcxy migügtijc huidibi ooy ndzocy njihuñyich jadu'n nej ixypí ngi'm'ung ngi'm'anächich, ca' nigoo mdzachDios'ájtigixy tijaty huidibi ca' ni ti mic'ajt miidity, jadu'n nej Dios Teedy tzajpjotypi ymic'ajt miidity.